

Natira gea, bio forsa

La producziun da products da bio crescha pli fitg ch'il consum

DAD ANDREAS CADONAU/FMR

■ **Dapli purs produceschan latg da bio visavi al consum creschi modest. Uschia ston ils novs producents da latg da bio furnir mumentan en il chanal convenziunal. Anc en ulteriurs secturs crescha la producziun da bio pli svelt ch'il consum dals products. Bio Grischun tematisescha la situaziun a chaschun da sia proxima radunanza generala.**

Il manaschi puril da la cuminanza da generaziuns Darms a Schnaus ha retschavi il bul dal brumbel da bio suentar la fasa da transfurmaziun da dus onns sin l'entschatta da l'onn 2020. E cun il sigil da bio la lubientscha da furnir products da bio, tar la cuminanza da generaziun Darms è quai primarmain latg. Per il mument ston els dentant furnir il latg convenziunal, almain enfin l'entschatta zercladur e forsa l'entir onn. Pervia da la surproducziun actuala da latg da bio ston ils novs producents spetgar. Per mantegnair il bun pretsch da latg da bio na vulan las organisaziuns da commerzi betg inondar il martgà cun memia bler latg. Latg da bio porta al producent en media 20 raps per liter dapli ch'il latg convenziunal. In motiv per blers producents da latg da midar en il sectur da bio. Il consum da products da latg da bio na crescha dentant betg uschè svelt, uschia ch'ils novs producents ston spetgar. Tenor las explicaziuns da la gestiunaria da Bio Grischun, *Bernadette Arpagaus*, sa mussian talas tendenzas er en auters secturs. Per exempel ha ella numnà il granezza u era tar labels da charn producida a moda durabla. In motiv da tematisar la situaziun a chaschun da la proxima radunanza generala da Bio Grischun ils 20 da favrer a Landquart. Ina runda da discussiun tranter auter cun il gestiunari da Bio Suisse, *Balz Strasser*, e *Michael Scheidegger* tar Coop responsabel per la durabladad. Els discuteschian cun ulteriurs exponents dal



Novs producents da latg da bio ston spetgar da furnir per betg smatgar il pretsch.

FOTO T. DEFILLA

martgà da bio strategias futuras per augmentar il consum da products da bio. En connex cun l'impurtanza creschenta da producir a moda ecologica, per part promovida da la politica agrara e giavischada da differentas iniziativas bainprest en votaziun.

Bler potenzial per bio

Surprendì da la situaziun nun è il president da Bio Suisse, *Urs Brändli*, sco ch'el ha explitgà dacurt vers la gasetta «Schweizerbauer». El ha menziunà che la situaziun saja stada previsibla gist pervia da las novas annunzias da blers manaschis per la producziun da bio. Da principi è il pre-

sident da Bio Suisse cuntent che blers purs èn pronts da producir tenor las prescripziuns da Bio-Suisse. Avant pauc onns hajan ins anc intimà puras e purs da s'annunziar per la producziun ecologica. Il president da Bio Suisse vesa anc bler spazi per la sparta da bio dad augmentar la cumpart al martgà da mangiativas che cuntanscha en Svizra actualmain 10 percent. Brändli ha fatg attent a la la svieutada ovs da bio che cuvria 27 percent da l'entira svieutada dad ovs en Svizra, tar il paun frestg cuntanschia bio 20 percent da la purschida. Ed il president da Bio Suisse ha visà a las discussiuns actualas pertutgant protecziun da la natira, biodiversità e clima che pledeschian a favur

da producir mangiativas da bio. La gestiunaria da Bio Grischun Arpagaus ha anc menziunà diversas acziuns in strada da la vart da Bio Suisse da far gust als consumers svizzers per dapli bio. Uschia cedan ils producents da latg da bio ina contribuziun solidarica da lur pretsch da latg a favur da diversas acziuns, sco degustar e mesiras per da promover la vendita.

Ils producents da latg impundan in mez milliun francs en la promoziun. Ed ils novs producents da latg da bio grischuns pon forsa gia a partir da mesa stad furnir il liquid per in meglier pretsch. Durant la stad tschessa numnadain la producziun da latg en Svizra.